

20 AUG 1998

Azhar-Bantu

AL-AZHAR AKAN BANTU BANGUNKAN INSANIAH

ALOR SETAR, 20 Ogos (Bernama) -- Universiti Al-Azhar, Mesir berjanji akan membantu Pusat Pengajian Tinggi Islam Kedah, Insaniah memajukan aspek pendidikan di kolej itu.

Sheikh Al-Azhar Dr Muhammad Sayyed Tantawi berkata beliau sedaya upaya akan berusaha membantu kolej itu mencapai tahap yang cemerlang dalam bidang keilmuan Islam.

Insaniah mengadakan sistem pengajian berkembar dengan Universiti Al-Azhar dengan para pelajar mengikuti pengajian di kolej itu selama tiga tahun dan meneruskan tahun akhir di Mesir.

Insaniah yang dimiliki oleh kerajaan negeri Kedah turut mempunyai pelajar dari luar negara seperti Thailand, Indonesia dan Brunei. Kolej itu menawarkan kursus peringkat Ijazah Sarjana Muda Usuludin, Syariah dan Bahasa Arab.

Berucap semasa menyampaikan ceramah umum di Kolej Insaniah di sini, hari ini, beliau berkata kunjungan beliau ke negara ini adalah perjumpaan yang ikhlas dalam usaha mengeratkan persaudaraan Islam antara rakyat negara ini dan Mesir.

Beliau berkata Islam adalah agama yang unggul serta mengajak umatnya supaya mempunyai akidah yang mulia.

"Dalam segala perlakuan umat Islam diseru supaya bersikap baik dan ikhlas," katanya.

Ceramah selama satu jam dalam bahasa Arab itu kemudiannya dibuat kesimpulan ke dalam bahasa Malaysia.

Menteri Besar Tan Sri Sanusi Junid, Presiden Pas Datuk Fadzil Noor, anggota Exco kerajaan negeri dan pegawai-pegawai kerajaan serta pelajar Insaniah menghadiri ceramah itu.

Dr Muhammad Sayyed berada dalam rangka lawatan ke Malaysia atas jemputan Perdana Menteri Datuk Seri Dr Mahathir Mohamad. Beliau sebelum ini telah memberi ceramah umum di Pusat Islam dan di Kolej Ugama Sultan Zainal Abidin (Kusza), Terengganu.

-- BERNAMA

MZM PR